

# 'Kikis sikap suka mengharap bantuan kerajaan'

BA 16 AUG 1985

**KUALA TERENGGANU,** Khamis — Perdana Menteri, Datuk Seri Dr Mahathir Mohamad, berkata hari ini rakyat tidak harus bergantung bantuan daripada kerajaan tetapi patut berusaha sendiri untuk maju.

Katanya, walaupun kerajaan bertanggungjawab menyediakan kemudahan, rakyat juga mempunyai tanggungjawab untuk berusaha bagi memastikan mereka dapat terus hidup selesa serta matlamat setiap rancangan kerajaan akan tercapai.

Dalam temuramah ringkas di studio mini RTM di Ekspo 10 Tahun

Pembangunan Negeri Terengganu di stadium negeri di sini, Datuk Seri Dr Mahathir berkata tidak ada gunanya rakyat mempunyai kekayaan jika tidak mempunyai usaha untuk terus maju.

Petang semalam Perdana Menteri merasmikan ekspo itu di Padang Hiliran dekat sini.

Datuk Seri Dr Mahathir juga berkata beliau puas hati dengan pembangunan yang dicapai oleh Terengganu, terutama di segi infrastruktur dan sebagainya yang penting untuk pembangunan rakyat.

Tambahnya, rakyat,

terutamanya di Terengganu harus berusaha bersungguh-sungguh dan merebut peluang yang ada untuk menikmati hidup yang sempurna.

Perdana Menteri dan isteri pagi ini berlepas ke Kertih dengan helikopter untuk merasmikan Lapangan Terbang Kertih.

Rombongan perdana menteri juga akan melawat Dermaga Timur di Teluk Kalung dan kilang besi waja (perwaja).

Pada sebelah petangnya, rombongan Datuk Seri Dr Mahathir akan berlepas ke Besut untuk menemui rakyat sebelum pulang.